

Flandres et la mer comme dessus est dit en un hommaige avec la conte de Flandres et en pairie aussi noblement comme ladite conte de Flandres est et doit estre tenue de la coronne de France, et avec il tenront les autres V.™ livres de terre qui seront assises comme dit est pres desdites contes de Nevers ou de Rethel a une foy et a un hommaige a par lui aussi noblement comme celle desdites contes dont elles seront plus pres assises et tenues de la coronne de France; et lesdites villes, chastellenies de Lille, de Douay, Dorchiez et toutes les appartenances et appendances dicelles tenront notre dit cousin ses hoirs et ses successeurs contes et contesses de Flandres en un hommaige et en pairie avec la conte de Flandres et aussi noblement que notre dit cousin tient et doit tenir ladite conte de Flandres, reserve a nous et a noz diz successeurs roys de France les fief, ressort et souverainete desdites villes, chasteaux, chastellenies de Lille, de Douay et Dorchiez et des appartenances et appendances dicelles, et les droiz royaux que noz predecesseurs roys de France y avoient ou temps quelles estoient es mains des contes de Flandres predecesseurs de notre dit cousin, et aussi reserve a nous et a noz diz successeurs roys de France le rachat desdites villes, chasteaux, chastellenies, appartenances et appendances, ou cas et par la maniere et condicions dessus diz; et ne seront tenus les hoirs de notre dit cousin de Flandres, contes ou contesses de Flandres de rendre et bailler yceulz chasteaux, villes, chastellenies, appartenances et appendances es mains de nous ou de noz successeurs roys de France jusques a ce que lesdites dix mille livres de terre au parisien monnoie de Flandres dessus dit leur seront plainement assises en franc demaine et delivrees par la maniere dessus declairee et quil en aient la paisible possession leument et de fait; les quelles villes, chasteaux, chastellenies, appartenances et appendances quelxconques de Lille, de Douay et Dorchiez nous, noz hoirs et successeurs roys de France, sommes tenus et avons promis et promettons loyaument et en bonne foy de dechargier de toutes charges et assignations faites sur ycelles a heritaige, a vie, a termes ou autrement depuis quelles furent baillies a noz predecesseurs roys de France, et en prenons des maintenant la charge sur nous et en acquittons et acquitterons plainement et en sommes garant a notre dit cousin de Flandres a ses hoirs et successeurs vers tous ceulz qui aucune chose len pourroient ou voudroient demander, sauf que saucunes rentes en sont alienees en heritaige a esglises depuis ledit temps, nous sommes tenez et promettons en bonne foy de en faire recompense a notre dit cousin de Flandres en autre terre assise bien et suffisamment entre ladite riviere de Somme et ladite conte de Flandres en franc demaine pres desdites villes, chasteaux et chastellenies, a tenir avec ycelles villes, chasteaux, chastellenies, appartenances et appendances quelxconques tout en un hommaige avec ladite conte de Flandres, ou nous paierons a notre dit cousin de Flandres pour mille livres de terre au parisien, si tant il y a vint mille francs dor de France pour une foiz, et se plus ou moins y a a lavenant; laquelle assiete ou paiement nous li devons parfaire et accomplir, comme dit est, dedans le jour de la Saint Remi premier jour doctobre prochain venant, au plus tart; et de ce len avons assuree par bons pleiges et suffisans, qui se sont fait principal debteur pour nous; et pour ce que depuis que lesdites villes, chasteaux, chastellenies, appartenances et appendances vindrent es mains de noz dits predecesseurs roys de France, iceulz noz predecesseurs ont acquis le chastel et la terre de l'Escluze empres Douay qui meurent et sont danciennete du fief et du ressort du chastel de Douay, nous voulons et consentons expressement que notre dit cousin de Flandres et ses hoirs par la maniere dessus dite en aient l'omage, et li en promettons a donner un homme heritier pour y avoir tout autel droit ressort et souverainete sur les diz chastel et terre de l'Escluze comme ses